



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

**ogers atema £117m agütsütsü
Chelsea-i mulunga agizükogo**

**UK ato kilonser inyaktsü Andy
Burnham shimogo**

VOL. XXIII ISSUE NO. 278 (ADOK 278) DIMAPUR SANGTENNÜ (TUESDAY) CHITENI (JULY) 21, 2026

₹ 5.00

ANCSU-i PMS-ST agütsütsü mapang züngzüksür

Dimapur, July 20, 2026 (TYO): All Nagaland College Students' Union (ANCSU)-i Department of Higher Education nung Ex-Officio Director dangi züluba shidi ka nung Post-Matric Scholarship (PMS-ST) menua magütsüba ajanga kaketshirtemi timtemba shiogo.

Higher Education Department-i ANCSU ketdangpurtem aser kaketshirtem dang July 18, 2026 nungi scholarship agütsütsü ta tiyazü ashiba aitsür. Iba ama tebilemtsü khuret mebeni inyaksangshiba aser jembiba ajanga kaketshirtemi Department dak temulung

malemer ta President Kivika Yeptho aser General Secretary Sotilo Tep nati shidi nung shiogo.

Department of Higher Education-i anogo asem tsüngda kaketshirtem nem magütsü aliba Post-Matric Scholarship(PMS-ST) 2025-2026 agütsütsü mapang züngzüksür. Iba mapang tsüngda magütsür onoki ozüangi melaba ama loktii lungkak aitba sentong agütsü ta ANCSU-isa metetdaksüogo.

ANCSU-isa Higher Education Minister dang iba onük atema rongdak süa tebang aitsü aser tebilemtsü khuret bena kaketshirtem yaritsü akhangar ta shiogo.

Centre CJP dang lungkak aitba anentsü mepishir

New Delhi, July 20, 2026 (Agencies): Union minister JP Nadda aser Cockroach Janta Party (CJP) züngsemtem Saurav Das o Ashutosh Ranka nunger senden ka amenba sülen Centre sorkari CJP dang Delhi nung lungkak aitba anenang ta shiogo.

CJP-i NEET-UG paper leak atema Education Minister Dharmendra Pradhan mapa nungi anentsü takhangba agütsür.

"Tang mezüng atema tanep lungkak aiteritem nungi sorkar den olemtep alitsü tebilemba ka aru aser onok tanep 11.05 nungi olemtepa arur. Senden kanga junga menogo. Parnok teshimtet telok den o jembitepba sülen tanü nikongdang 4:00 ako meta kü nem tezüluba shidi ka agütsüogo" ta Nadda-isa shisem.

"Ni lungkak aiteritem dang mener lungkak aitba anentsü aser administration den yaritepa tensa süngiemtsü mepishio" ta paisa shisem.

"Kü den spokesperson, Ashutosh Ranka nati Nadda den par kidang minute 10 atema ajurutepogo aser pa nem takhangba onüktem indang shidi agütsüogo" ta CJP spokesperson Saurav Das-ia ashi.

"Onoki shidi agütsüdang pai onok den telong nung jembitsü ta nangzük. Onok ibaji teinyakdak lir. Minister-i tim jenjang ka nung iba onük lemsateptsü ta nangzükogo saka tang tashi tenangzükbatem kecha magi lir. Onoki akhangba ama meinyak tashi timi lungkak aitba manentsü" ta paisa ashi.

Nagaland Congress-i "Chhatron Ki Goonj" campaign maneni agütsü

Kohima, July 20, 2026 (TYO): Congress party-i linük ajungalen examination paper leaks anema "Chhatron Ki Goonj" campaign maneni agütsü ta Nagaland Pradesh Congress Committee (NPCC)-i metetdaksüogo.

Takoksa ajuruba kaketshirtem nem temeten magütsü tashi iba campaign agütsü ta parnoki nenshi.

Congress-i Nagaland nunga iba campaign ulushia agütsü aser lennirtemi grassroots level nung agütsü tetuyuba agütsür ta Congress Bhavan nung NPCC working president Khriedi Theunuo-i osangbener dang ashi.

Linük nung education aser examination system nung tamakoktem onoki tuteta sayutsü aser iba campaign ajanga kaketshirtem ajangzüksü imlar ta Theunuo-isa ashi.

"Congress-i politics tangatetba nung masü saka kaketshirtem dak rangloker iba onük jembir. Linük nung examination paper leaks aser recruitment irregularities ajanga lanur aser kibong million aika taginüba raksatsüogo" ta NPCC

working president, C. Apok Jamir-ia ashi.

"Tsüraburtemi pei chirnurtem züngdaksütsü atema sentsüh bendener mesüra kiojen yokdoker. Külen kaketshirtemi competitive examinations atema küm aika renemer saka ochimashi aser inyakyim meshitakba ajanga parnoki merangba amajok kümdaksür" ta pai ashi.

Tesüiba küm ter tsüngda examination paper leaks 150 tema liasü aser iba ajanga kaketshir crore 7.5 dak kongshi ta Rahul Gandhi-i shiogo. Iba ya sorkari tim teinyaktsü meinyakba ajanga lir ta Apok-isa metetdaksü.

Nagaland densema linük kübok tesem aika nung kaketshirtemi lungkak aitogo. Fed Up Naga movement ajanga public-i educational aser recruitment institutions dak tamang makaba sayur ta paisa shisem.

June 17 nü Leader of Opposition Rahul Gandhi-i Kota, Rajasthan nungi "Chhatron Ki Goonj" campaign tenzükja liasü. Iba ya Indian Youth Congress aser National Students' Union of India ajanga ketdangsüa agir.

Chief Minister Dr Rio-i anir teshimtet telok kati Mon semdang



Dimapur, July 20, 2026 (TYO): Chief Minister Dr. Neiphiu Rio-i anir teshimtet telok kati July 20 nü Defence Colony, Walo Ward, Mon nung anentsüh aludak semdangogo.

"Iba lendong atalokba atema kanga sasar aser takoksa ajuruba kibongtem den külemi noktaker" ta Chief Minister Dr. Rio-i ashi.

Iba lendong nung volunteers, Civil societies, SDRF Mon, DEF Mon aser District Administration-i kanga meranga yaritepba atema pelar aser maneni nenok teyari nüngdaker ta pai ashi.

"Nagaland nung tanü asenoki

climate change ajanga kongshiba ajangshir. Asenoki lendong ataloktsü ana nung aliba tesemtem nung kiojen yangludang Building by Laws aser iba mesükba telatetbatem sülen anidaksüla" ta Dr. Rio-i ashi.

Konyak Union-i ketdangsüa civil societies ajanga iba mapa nung yaritepdang amshitsü atema tang rongdak Rs. 10 lakh agütsür ta paisa shisem.

Konyak Legislative züngsemtem tenüng nung jembidang Advisor, W Chingang Konyak-ia takoksa ajuruba kibongtem den külemi noktakba ashi.

Konyak Union nungi Investigation Team ajanga Mon jila nung takoksa ajuruba indang video clip tatsüka ka ajanga osang lemsatetp.

Tizit, Naganimora, Sonari, Wakching aser Aboi amala den sendaktepba lenmangtem nung anentsüh aluba Mon jila tesentaktep kecha mali kümogo ta Investigation Team-isa metetdaksü.

Mon DC Wennyei Konyak, NCS-i aser Konyak Union President, Yamao Konyak nati CM Dr. Rio aser par teloki semdangba atema tenüngsang agütsü.

Tuli aser Ao penzülen tzümetsüng adok, Langpangkong len lenmang raksaba agi gari jajatsü mesademer



(Abelen) Tuli town Police Station tzü agi atsünpangba aser (Achiji) Chuchuyimlang aser Unger tsüngda lenmang tiyong kaddanga anenzükba noksa nung angur.

Mokokchung, Chiteni/July 20(TYO) : Mokokchung District kübok aliba Tuli town, Tzüdikong aser Ao Penzü tesem nung tzümetsüng agi ki atsünpangba aser Langpangkong lenmang tesem balala nung anentsü alua lenmang raksar aliba talisa Unger yim aser Chuchuyimlang tsüngda lenmang tiyong kanga dang tulu ka kaddanga anenzükba agi iba lenmang nung senzü majungba agi Mokokchung Deputy Commissioner Ajit Kumar Verma

ajanga langpangkong lenmang nung senzütsüpurtemi iba lenmang melena Mokokchung leni aturtemi Unger Local Ground-Kilengmen/Asangma lenmang jajatsü aser Mokokchung nungi alurtemi Kilengmen/Asangma

lenmang lenjem nungi Unger Local Ground leni alutsü ta metetdaksü.

Deputy Commissioner-i iba sangdong ya nübur kümzüka alitsü asoshi metetdaksü aser ya Light Motor Vehicle atema dang lir ta kasa sangdong nungsa metetdaksü.

Osang ajanga angashiba agi Tuli aser Tzüdikong nung tzümetsüng agi ki 30 shi kongshia kidang alirtem timtem ajuru aser ano Ao Penzü yim nungbo ki 50 tema tzü ani atsingbang nung temeket alir kidang jenok aser July 20 anepdangbo tera süngjema adok nung ki kiburtem pei ki bushia aoba osang lir. Tuli nungbo ano Primary Health Center aser Police Station dena

atsünpangba osang lir. Item tzümetsüng agi ak ki aser an ki raksaba dak alaka ki raksaba mesüra ki ponger aobabo maliasü aser talisa yiruba aser tasübabo matalok.

Langpangkong len anentsü tesem tesem nung aluba talisa National Highway-2 kongshia lenmang nung anentsü kangasa sashia aluba agi gari mapang tatsükabo mejajatetsüsa tia ka nung lir iba dakji ajemdaker Mokokchung Deputy Commissioner ajanga iba dak ajemdaker senzusenpongertem nem tetuyuba agütsüogo.

Ano Milak ayong nung Yajang yimtaki atuba Merang apu tzü agi nonger aluba agi senzusemponger majajateti lir.

Noklak nung küm 3,500 tain nisung aliba tesem bushitet



Noklak district kübok Chiphur nung Leilo Kaa rockshelter nungya küm 3,500 tejakdang nisung aliba kuli balala archaeologists temi nguteta liasü.

Dimapur, Chiteni/July 20 (TYO): Archaeologist telok kati Noklak district kübok Naga Hills Ophiolite Belt nung longpok aser long arangtepa alidang 'prehistoric' mapang nisung aliba kuli temi nguteta Nagaland asoshi akhi alemli nisung aliba tongtipang otsü kaktetogo.

Nagaland University aser Department of Art & Culture

nungi team kati Chiphur area limestone tua bushiba mapang ajong agi yangluba chipo, long agi yangluba hadir, mi apuba tesem aser carbonized cereals tem ngutet.

Leilo Kaa rockshelter nungya küm 3,500 jakdang aliba aser Kathso Kaa longpok nungya küm 1,000 tejakdang nisungtem aliba scientific yimya balala amshiba bushiba

nung nguteta liasü, anungji akhi alemli region nung alu ayimba aser nisungtem aliba indang temaitsü tasen sayur.

Item tesem ngutetba ajanga prehistoric human migration nung Northeast India tongtipang ta akangshitsür aser nüburttem dang item oset ya October ita sayutsü sentong lir, ta research agirtemi ashi.

2026-27 atema Chief Minister's Life Insurance Scheme yanglushi

Dimapur, Chiteni/July 20 (TYO): Nagaland sorkari 2026-27 atema Chief Minister's Life Insurance Scheme (CMLIS) yanglushiogo, anungji temsüa aliba kibong tem nung insurance coverage ya ulushia 'breadwinners' atema life insurance angati agütsütsü aser parnok aser kibong nung züngsem asem tashi nem accidental insurance agütsütsü.

Finance Department ajanga June 30 nü sangdong ka agütsüba nung, temsüa aliba kibong shia 'breadwinner' asüba atema life insurance coverage sen 2 lakh agütsütsü aser iba premium ajunga state sorkari agütsütsü, ta ashi.

Iba den ano scheme yagi kibong nung senotsü bena arur (breadwinner) aser kibong nung temsüa aliba züngsem asem tashi nem accidental insurance sen 2 lakh agütsütsü, aser yangji 'accidental death' aser tetsü asoshi tsüngtsük-longtsüker kumdaktsüba awajemer.

Accidental dismemberment aser paralysis asoshi compensation sen 2 lakh tashi agütsütsü aser partial disability atema sen lakh ka tashi agütsütsü.

Tang yanglushiba scheme ya

tuluba Pradhan Mantri Jeevan Jyoti Bima Yojana (PMJJBY) aser the Pradhan Mantri Suraksha Bima Yojana (PMSBY) indang 'eligibility norms' den kasa lir. Life insurance atema 'eligible age' arishi küm 18-50 aser accidental insurance atema arishi küm 18-70 alitsü. Ajisüaka sorkar mapa inyaker State Government Salary Package agi mawajemer atema life insurance asoshi 'upper age limit' ya salatsüogo.

Iba scheme yagi Nagaland lisopur mesüra teti atema alir Indigenous Inhabitant Certificate mesüra Permanent Residential Certificate tejangja aliba principal breadwinner ayimjemtsü. Operational guidelines nung aliba ama dependants tema tenüng zülüoktsü akok.

Nagaland nung inyakba accredited journalist tema iba scheme agitsü temsür, ajisüaka scheme indang online portal ajanga verification asütsüla. Sorkar mapa inyaker state alema tanga tesemtem/state nung oa alir, work-charged, casual aser contract nung inyaker State Government Salary Package agi mayimjemer tema adentsü.

Regular sorkar mapa inyaker Salary Package kübok awajema alirtem iba scheme nung madentsü. Tiazü sangdongba, documents meshidak mesüra yanglushir amshiba mesüra verification process shidak meinyaki register asütsü merangba magizüktsü.

Sorkari registration aser validation ya official CMLIS portal ajanga Aadhaar authentication aser mobile OTP verification amshia digital yimya nung inyaksü yangluogo.

Applications agütsüba ya online ajanga lemozükja aliba ketdangsür temi agizüktsüla aser Finance department ya 'final approving authority' asütsü.

Accidental insurance meshitsü atema post-mortem report ya kechi südir süaka sayutsüla. Ajisüaka kuli tejangja kar mechi post-mortem ya magitetsüsa lira, tejangja executive magistrate mesüra administrative officer ajanga inquiry report agütsüba agizüktsü.

Item verification aser processing mapa nung yariteptsü district administrations nem nungloksüogo.

Advisor A. Pongshi Phom-i Dimapur Railway & Airport semdang

Dimapur, Chiteni/July 20 (TYO): Advisor, Airways and Railways, Government of Nagaland, A. Pongshi Phom-i ki o jen yanglushiba maparen reprangshimsü aser nüngdakba ken o jembitsü atema July 20, 2026 nü Dimapur Railway Station aser Dimapur Airport semdanga liasü.

Phase-I kübok Modern Railway Station yanglutsü aliba dak sendakba nung Dimapur Railway Station nung Advisor mendenpuba sür senden ka mena liasü. Iba senden nung pai tang teinyakdak kisü-jensü mapa aser terenlok mapa tem reprangshima liasü. Pa den Additional Secretary, A.I.R. Cell, Transport Department, Thsuvisie Phoji, NCS; Deputy Commissioner, Dimapur, Dr. Tinojongshi Chang, NCS; Officer on Special Duty (OSD), Transport Department (A.I.R. Cell), M. Ababe Ezung; Railway ketdangsür aser district administration nung iba senden nung dena liasü.

Iba sülen Advisor A. Pongshi Phom-i Dimapur Airport semdanga yangji airport terenlok mapa asadangsü asoshi Airports Authority of India (AAI) ketdangsürtem den senden ka mena liasü.

Iba senden nung Airport Director, Airports Authority of

India, Dimapur Airport, Moa Pongen den AAI aser state sorkar nungi ketdangsürtem dena liasü.

Advisor A. Pongshi-i iba senden nung jembidang, airport nung ken o balala tejangja metettsü aser State sorkari akokba lenmang nung yariteptsü asoshi lenmang bushitsü atema semdangba lir ta ashi.

Nagaland nung airport ka dang lir, anungji airport terenlok asoshi tetsükdaktsü ajurubatem angatettepa inyaksü asoshi state sorkar aser Airports Authority of India külemi teka amteper inyaksü nüngdaker, ta pai ashi.

Iba ama senden amenba ajanga dang asangsang nung ken o tejangja meteter aser stakeholders temi shisatsü lemsatepba asadanger nüngdakba mera tem agitsü, ta ashi.

Senden nung APD, AAI, Dimapur Airport, Moa Pongen-i Dimapur Airport indang puti otsü tongmelang agi lemsatep aser tang terenlok mapa teinyakdak aliba indang osang agütsü. Pai ali ken o tang tashi tatem kati maruteti aliba nung state sorkari maneni yaritsü ayongzüka liasü.

Iba senden nung ali agia aliba, tzü atsüngba, jana indokba, runway yanglutsü nüngdakba indang jembia liasü.

Shamator district nung alinen agi lenmang aika raksatsü

Dimapur, Chiteni/July 20 (TYO): Shamator district nung asemnü tzünglu tanen makai kanga sashia aruba ajanga alinen alua town pipeline raksatsü, Shamator main road nungi lenmang aika raksatsü aser Chessore-Agunato lenmanga raksa.

Kebeak, Chessore area kübik Y. Anner yimtsüng nung alu kar rakaogo aser Chessore-Shamator tsüngta alinen agi lenmang anenbanga lir.

Kasa mapang Deputy Commissioner & Chairman, DDMA, Shamator, Arikumba-i nüburttem dang Disaster Management Act, 2005 indang Section 26 (2) aser Section 30 (2)(v) kübok tekumdangtsü metetdaksüogo.

Sangdong nung DC Shamator ajanga nüburttem dang tzüngsang mopung takzua aser meteta alitsü, tzüngsang mopung metettsü atema Play Store nungi Safer Nagaland application download asütsü ayongzüker.

Tzümetsüng aliba tesem temi maotsü aser apu ajangdang mesüra tzü aliba tesem anasai aodang kanga kumdangtsüla, ta ashi.

Senzüsempong dang aser talisa tzümetsüng adoktsüsa mesüra alinen alutsüsa aliba lenmang tem amshiba mapang kanga saksalema alitsüla, tzünglu kanga sashia arura aser

tenük agi mongui kumra, tzüngsang tajungba makum tashi senzüempong mesüi alitsüla, ta pai ashi.

Meyi mapang nüburttem dang ammag nung senzüsempomng masütsü ayongzüker, power lines anasai maotsü aser power lines tsüka aluba mesüra sangzua aliba ngura, ketdangsür nem metetdaksütsüla, ta Arikumba-i sangdong nung ashi.

Teintet rogo, tanur aser matamabensar dak tenük yoktsüla aser teyari nüngdaka alir den yariteptsüla.

Ajungben lendong timtem ajurudang ketdangsür nem osang agütsütsüla. Alinen aluba, tzümetsüng adokba, lenmang raksaba mesüra süngdong laoba lira, District Control Room (DEOC) 7005092299, Emergency Contacts 7085030301- SDO (C), 7005103148 - EAC Hq. 7005092299 DPA, DDMA Chessore Sub-division 8787829986 SDO (C) State emergency operation centre, 03702270129/03702270130, 1070 (Toll free number) 112 (ERSS- Extension for disaster management) amala nung osang agütsütsüla.

Nüburttemi pei takum kumzüka alitsü asoshi ketdangsür den amalitep akatsü ayongzüker, ta sangdong ajangasa ashi.



District Disaster Management Authority (DDMA) Wokha indang ajungben senden ka Deputy Commissioner, Wokha indang office chamber nung July 20, 2026 nü mena district nung tzünglu maneni aruba ajanga kongshiba asadangtepa liasü. Iba senden nung Deputy Commissioner Wokha, K. Mhathung Tsanglao menden liasü aser pai züngsemtem dang district tensa lemsatepa liasü.

CJP lenirtemi Union Minister JP Nadda ajurua senden amen



July 20, 2026 nü New Delhi nung Union Minister, JP Nadda-i par kidang Cockroach Janta Party (CJP) nungi otongdar ana- Saurav Das aser Ashutosh Ranka na ajurua senden amenba sülen tangokba noksa nung angur.

New Delhi, Chiteni/July 20 (Agencies): Hombarnü New Delhi nung Cockroach Janata Party (CJP) züngsemtemi Parliament tashi longkak aita jajaba mapang nung police-i parnok nokdangtsü meranga tear gas khaloktsüba den tashiyim tera amshia liasü.

Jantar Mantar nung longkak aiterterem meyrjang aika adenshiba sülen longkak aita Parliament-i aodang police-i longkak aiterterem aika puogo.

Ano külen Hombarnüsa CJP otongdarterem- Saurav Das aser Ashutosh Ranka nati Union minister JP Nadda ajurua senden menogo, ajisüaka tang tashi nungbo sorkari kecha menanzük, CJP-i metetdaksü.

Saurav Das-i X ajanga, "Tanü anüngdang 12:00 ano nungi Ashutosh Ranka küna JP Nadda'er kidang liasü. Onoki akhangba onüktem pa nem

metetdaksüogo, iba denji külemi tangsa Dharmendra Pradhan menden nungi anentsütsüla ta takhangba agütsüogo. Ajioda Minister-i pai ibaji tim level nung jembitsü ta shiogo. Ajisüaka tang tashi nungbo onok nem tenanzükba kecha magütsü. Onoki akhangba mataloktsü tashi onoki tesünap nung maneni longkak aittsü," ta metetdaksü. Saurav Das-i, "Administration-i sorkar den ken o jembitsü atema lenmang lapoktsütsü meranger. Parnok kanga menor aru saka onoki parnok den jembitsü melunga dang lir. Tang tashi nungbo parnok tsütsülen nungi telangzüba kecha agüja mali," ta metetdaksü.

CJP lenirtemi Union Minister J.P. Nadda dang, Sonam Wangchuk chioktsüla, Dharmendra Pradhan menden nungi anentsütsüla aser soseta

asüba NEET candidates kibongtem nem sen crore kaka teyari agütsütsüla, ta takhangba agütsü.

Ano külen tanga osang ka nung, Hombarnü Union Home Minister Amit Shah-ia Education minister, Dharmendra Pradhan ajurua ghonda pezü shi senden menogo, ajisüaka senden nungji kechisa jembiar memetetdaksü.

Honibarnep Delhi police-i tashiyim amshia Sonam Wangchuk hospital-i anir aoba sülen mapang tatsüka tsüngda Cockroach Janta Party (CJP) tentetsang, Abhijit Dipke-i, pai mapang telatet makai lumia longkak ait tenzüker, ta metetdakja liasü.

Ajisüaka Hombarnü Sonam Wangchuk-i mepishiba nung ajemdaker CJP tentetsang, Abhijeet Dipke-i lumia longkak aitba anenogo.

Parliament nung Kharge-i NEET paper leak asüba onük benok

New Delhi, July 20 (Agencies): Hombarnü tzüngluruwa mongpu Parliament senden tenzüka anogo nung Congress Tir aser Rajya Sabha nung opposition lenir, Mallikarjun Kharge-i NEET paper leak asüba onük benok aser Jantar Mantar nung longkak aiter kaketshirtem dak police-i tashiyim amshiba metetdaksü.

Senden nung jembidang Kharge-i, "Paper leak asüba aser NEET exam oshimashi dak sendakba nung kü tebilemba lemsateptsü atema nenoki kü

nem temelaba agütsüogo. Iba onük ya kaketshirtem dak sendakba onük ka lir. Ni kaketshir lakh aika tarutsü jenjang atema jembiar. Iba atemaji Jantar Mantar nung kaketshir meyrjang aika adenshiogo. Yangji police-i tashiyim amshiogo. Sorkari tashiyim amshitsü, ola nembangtsütsü aser parnok meindoktsü meranger," ta metetdaksü.

Kharge-isa kaketshirtem olaji angatsüla aser exam agiba inyakyim ya teladak asütsü atema inyaktsüla, ta takhangba

agütsü. Pai jembiba o anema rongrong adoka liasü aser ruling party o Opposition züngsemtem tsüngda yimyim ayima o langzütep.

Rongrong tuluba adokba ajanga Rajya Sabha Chairman C.P. Radhakrishnan-i senden thinen.

Opposition-i exam balala agiba inyakyim melenshitsü atema takhangba agüja arur.

Hombarnep Aam Aadmi Party (AAP) lenirtem- Manish Sisodia aser Atishi nungera Jantar Mantar-i oa longkak aiterterem pusema liasü.

J&K nung anentsüh lendong nung nisung 14 asü

Jammu, July 20 (Agencies): Jammu & Kashmir kübok Poonch aser Rajouri district na nung anentsüh lendong nung nisung 14 asü, nisung aika sama aser ki aika chirepogo.

J&K Chief Minister, Omar Abdullah New Delhi nung anogo ishika amongtsü teblilemba liasü, saka lendong atalokba osang angashiba sülen pa ilonga Jammu-i aru, ta osang ka ajanga metetdaksü.

Poonch district kübok Surankote, Haveli aser Mandi nung Police, Army, SDRF, civil administration aser temelungertemi kümzüka maparen inyakdar.

Surankote nungbo kibong ka nungi züngsem 8 tashi anentsüh agi anenbanga liasü.

LG, Manoj Sinha-i iba tensa asadangba sülen ketdangsertem dang lendong agi kongshiba kibongtem nem teyari agüjang, ta tuyuogo.

LG Sinha-i, "Lendong agi kongshiba kibongtemji aienshidaksüogo aser department ajak yakyaka lir. Ni

nüburtem dang süngjemtsü aser ketdangsertemi tuyuba tashi angatsü mepishir. Rajouri aser Poonch na nung nisung aika asüba atema ni kanga jashir," ta metetdaksü.

Tzünglu maneni aruba ajanga ketdangsertemi Jammu-Srinagar NH-44 nung akok tashi mesenzütsü metetdaksüogo.

July 3 nü Amarnath Yatra tenzüka liasü, ajisüaka tsüngsang-mopung majungba agi Katra nung aliba Vaishno Devi shrine-i aoter temeshi ainlen jajartem aser Reasi nung aliba Shiv Khor-i aoter temeshi ainlen jajartem ainlen jajaba nokdangogo.

IMD-i ashiba agi, Jammu nung ano maneni taruba anogo asem tashi tzünglu arutsü.

Jammu division nung Chenab ayong densema tanga ayong aika nung tzü kanga metsüngbanga ayimba nung ajemdaker ketdangsertemi talisa ayongkümlen alirtem dang kanga kumküma alitsü metetdaksüogo.

E20 petrol ajanga gari nung timtem adokba osang mali: Centre

New Delhi, July 20 (Agencies): Hombarnü Parliament nung Centre sorkari, gari nung E20 petrol totzü atsükba ajanga gari engine nung timtem adokba, totzü pump nung timtem adokba mesüra gari nung timtem balala adokba osang mali, ta metetdaksü.

Rajya Sabha senden nung telangzüba agütsüdang Minister of State for Petroleum & Natural Gas, Suresh Gopi-i, petrol nung ethanol shilem 20 inokba ya sorkar agencies, gari yanglurtem, totzü companies aser technical institutions densema scientific tsütsülen nungi shilem lemsar jungjunga asadanger benokba maparen ka lir, ta metetdaksü.

Rajya Sabha MP John Brittas-i, gari yangluba company tem, industry mesüra consumer organization karibo E20 petrol amshiba ajanga gari engine raksaba, mileage ajema kümdaktsüba mesüra gari nung timtem balala adokdaksüba osang sorkar nem kümzüko, ta metetdaksü.

metetdakja lir asü?, ta asüngdanga liasü.

Sorkarisa, Ethanol Blended Petrol Programme ya NITI Aayog, Oil Marketing Companies, Automotive Research Association of India (ARAI), Society of Indian Automobile Manufacturers (SIAM), Indian Institute of Petroleum aser gari yanglurtem densema jungjunga asadanger benokba mapatong ka lir, ta ashi.

Petroleum ministry-i, petrol nung ethanol shilem 15 India nung küm asem ser tesadang amshia liasü aser E19-E20 ya küm ana ser tesadang amshia arur, ta metetdaksü.

"Two-wheelers crore 20 dak tali aser petrol gari crore 3 dak talii E20 amshia arur saka gari engine nung timtem adokba indang kuli kecha mali," ta Ministry-i metetdaksü.

Sorkarisa, Ethanol Supply Year 2014-15 sülen iba programme ajanga sen 1.97 lakh crore dak tali kümzüko aser crude oil 316 lakh metric tonnes sorkar nem kümzüko, ta metetdaksü.

July 20, 2026 nü Jammu nung Jammu & Kashmir National Conference (JKNC) nung züngsemtemi J&K nem tanaben state jenjang agüjang, ta takhangba agüja longkak aitba noksa nung angur.



PUBLIC NOTICE
Registered Office: ICICI Bank Tower, Near Chakli Circle, Old Padra Road, Vadodara- 390007
Corporate Office: ICICI Bank Towers, Bandra-Kurla Complex Mumbai – 400051.

HON AUCTION & JAOKBA SANGDONG
Tsünglanglen metetdakja aliba sen apur (tem) dang hon osettem agüja ICICI Bank Limited dang nungi loan agiba sentsüh agüjang ta metetdakja liasü.
Ajisüaka sentsühji magütsüet nung parnoki agüja aliba hon osettemji August 20, 2026 anogo nung ayoktsü. Sen apurji süadoker süra telatetba ajakji par senmanger (tem) dak benshitsü.

Loan A/C No.	Borrower Name	Auction Branch Address
Branch Name: Dimapur		ICICI Bank Ltd., H No. 586, Dhoibinla Road, Dimapur, Nagaland - 797112
047657000041	Pawan Kumar Jain	
047657000039	Pranab Kar	

Auction ji table nung shia aliba address/anogo/tem nung ayoktsü. Mapang: Nikongdang 3:00 ako nungi 6:00 ako tashi.
Osangjelia memetdaksüi auction anogo/ mapang/auction inyakyim melenshitsü atema ICICI Bank dak temeden lir.
Tejangrartermi auction dak sendakba osang aser telatetba tejangja metetsü atema tekalen agüja aliba Branch/es semdangtsü akok.

Date : 21.07.2026
Place : Dimapur

Sincerely, Sd/- Authorised Signatory
For ICICI Bank Limited



TIR YIMYIM YIMOBILEM (EDITORIAL)

DIMAPUR TUESDAY, JULY (CHITENI) 21, 2026

Asenok kümdangtsüym

Taoba anogo ishika Nagaland tesem balala nung tzünglu khena maneni aruba agi nisung alidak tesem aika nung anentsü aluba aser tzümetsüng adokba agi nisungtem kiojen dang masü saka tesasatsüka taküm dena aika samaba aser yiruyipongba osang asenoki angashidagi. Atangji, tzünglu aruba agi anentsü aluba aser tzümetsüng adokba lendongtemjibo asenok mekümdangba agi masü saka asenoki menokdangtetba alima lendong atalokba amai ka asenoki bilema alitsüa akok. Ajisüaka, asenoki kodang jungjunga bilemdangdir, atangji, asenoki tzünglujibo mesoitetsü saka tzünglu aruba ajanga asenok alidak tzümetsüng agi asenok timmatemtsüsabo asenoki inyaktetsü aser tzünglu aruba agi asenok ki anenzüka maotsüsaa asenoki yanglutetsü. Aiben asenoki itemji junga mebilemdanger aser asenok alitsü asoshi talidak yim aser kimong mesemtetba mapang asenoki item alima lendong atalokba mapang asenoksasa asenok kümzüka alitsü bilema jelia sentong meyanglur aser mapajia akangasünga meinyaker. Atangji, tang ama tzünglu khena maneni aruba mapang ano menoknok dena anoka ali anensaa ao nungbo, ajia balaka, ibajibo nisung ashi agibo menokdangtettsü. Ajisüaka, tanga lima nung tangarbo menoknok tulu anokba nungia kiojen aser taküm kümzüka alitsü bilema tamasayongi sentong shitak yanglur kiojen mapa tenzüker. Iba ama jelia alima lendong mapang nunga asenok aliba kiojen aser taküm kümzüka alitsü asoshi sentong yanglur yimti yanglu tenzüka agi, yimti nung kiyong aser mepu ajak bentetbenteter, yimdong tesadem, kilentzü shitak alir, anakawa mashimashi kilentsü, arem aser ayong nung meinokdoki timi bendena bener oa tesem ka nung teshinem memenemtsüsa aser tzü mopong memenentsüsa endoker. Joko, alima aika nung yimti nung janaona bendenba agi tagitsü kuma yangluba sengtongtema tenzüka lir. Aji oda, alima nung küm meyi asem pezü jakdang atalokba Indus valley civilization indang azüngdang, iba mapang Indus lenden nung yimti akümertemi yangluba kisüjensü yimyaaji reprangdangra, parnoki kanga temulung agüja inyakbaji yimti nung tzü atsüngdaka meyui yimzüka aotsü kilentzü tesadem yangluba asenoki angazüker. Tanü asenok libaliro aser inyakyim reprangdangra, küm meyi pezü jakdang aliba Indus nungertem kolok aser tangatetbaa madoksa, kechiyong asenoki tanü asenok alitsü tesem mesemteta kiojen yangluba reprangdangra, asenokibo yimti yimdong nung kilentzü tesadem yanglua merüka ayutsü melen ayong dena nokdanga nembanger iba madak ki asür. Ibaji dang masü saka yimteni kilentzü tilaka yanglua toktsübajia asen jana endokdak akümer. Aji oda, asenok benjongbentsü nung amshiba plastic auso aser marok ajak to gari nung oshia bener orr ayong nung toka toktsür. Iba jagi tang ama tzünglu arudang asen kilentzü aser asenok anasa aliba ayong nung motzü sadema moutet, tzünglu tzü motzü agi tzümetsüng kümer asenok takoksa aser tesama ajurur. Aji oda, asenoki takong mapang tzünglua kodanga marutsü amai bilema longpang tasepdak nung ali tashi itta malidak ki asür. Ajisüaka, itemji ali nung junga akanga mamendak ser mashimashi yangluba ki asünungji, tang ama tzünglu anogo piyong arudangbo ali tema aser telong ajakji medemjema metener anenzüka alur, idangji lendong ajurur. Atangji, alima nung asenoki menokdangtetba lendonga aika lir saka ano asenoki nokdangtettsüba lendonga aika lir. Anungji, asenoki nokdangtettsüba lendong nungi asenoksasa asenok kümzüka litettsü asoshi, joko, tanü asüngbo asenok aliba ki, kiyong aser yimti ajak ya 'plan city' yimya aser inyakyim nung yanglutsüla. Iba jagi asenok alima lendongtem nungi kümzüka dang masü saka asen alidak asenok jangratema alitsü.

OLEMSABANG

Kima nung Atsü ayimba

Source : Nokinketer

Kima atsü ayimba ya tsünüsembongtsü adotaktsüba mapa ka lir, mozü amshiba süngdong/ tsünüsembongtsü, tilateri tapu balala (spices). Tesem tilaka nung tsünüba,pei aliba ki tesem meketa aliba nung, küm tepiyung kidang aonsotsü agizükben achitsü atema tsünüba.

KIMA NUNG ATSÜ AYIMBA TELEMSA BALALATEM

- * Aonsotsü kisüng tsünüba atsü.
- * Aonsotsü tsünüba den külemi spices aser mozü atema tsünüba süngdonglidongtem.
- * Aonsotsü aser süngjanglijang atsü.
- * Aonsotsü, süngjanglijang, spices aser tu tapu balala (herbs) tsünüba atsü.
- * Aonsotsü aser naro tsüki.
- * Aonsotsü temeyoktep, süngjanglijang, spices aser tu tapu balala (herbs) tsünüba atsü.

KIMA NUNG ATSÜ AYIMBA NÜKJIDONG

- * Kima nung atsü ayimtsü tenzükdang tongmelang tenüngdakattemji:
- * Kibong nung nütsünyongsük kwi lir iba dak ajemdaker atsü tasazük ji asazüker.
- * Iba ya ki anasa asütsüla.
- * Atsü ayimtsü atema tesemji tetemsü aser melamela inyaktedsüla asütsüla.
- * Moapu anü polokba tesem asütsüla, kechibasüra tsünüsempongtsü junga aintsü atema anü tesangwaji kanga nüngdak.
- * Aküm maliba tesem asütsüla.
- * Tzüpu anasa, tzü yimdaka aliba anasa aser tzülentu lenmang balala nungi iba den ano joka nungi aloba tzü koba amshitedtsü akok item ji tsünütsü atema amshitsü.
- * Kima nung atsü ayimtsü tesem tajungtibaji anülulentip tesem koba atsü agi longbanga atsüa lir idakji ayimtsüla.

TSÜNÜTSÜ ATEMA ASAMEYANGBA TELEMSA

- * Kibong nung nütsünyongsük 5-6 alirtem atema aonsotsü peria tsünütettsü asoshi ali tasazükji 200 m-2 bo asütsüla.
- * Tsünütsü yokdangji jajatsü tesem, nala, küm aika aliba tsünütsü, teti asoshi ayutsü osettem, item jungjunga asameyanger tsünütsüla.
- * Ali koba tashi wapet iba nung ajemdaker ali tasazükji adoktsü.
- * Kima atsü nung tsünütsü atema tsünüsembongtsüji tsüngküm mongpu, taliba tesem, ali kobadaka lir, ali temo koba tashi lir, pei-i kechi sapur aser kidang alirtemi kechi sapur iba nung ajemdaker tsünütsüji shima yoktsüla.
- * Aonsotsü prokdang tatongi tsünütsüla.
- * Aonsotsü/süngolemba tsünütsü atema ali tasazük tera dang nüngdakattemji, jebi tila (lettuce), putina (mint) aser Tania (coriander) itemya lir, iba tsünütsütem ya atsü tatemlen kinük nung lenmang anasa aser tzü lenmang alilenji tsünütsüla.
- * Aonsotsü tsünütsü atema ali tasazük aika nüngdakattemji, alo, peyas/lasüng, azüngken, loli nunger yamala, item aintsü atema tesem peria toktsütsüla.
- * Temokong mapang tsünüba aonsotsü radish, carrot, turnip, yamala. Koba tazü lon yanglutsü atema amshir itemji atsü tsünglanglenji maneni tsünütsüla.
- * Metong talang adangba aonsotsü poka,lao amala, loli (French bean) item aonsotsü ya meyi mapang tsünür. Aser motorji mongpu mapang atsü atsüa aliba züng temeket tesem nungji artsü anasa tsünütsüla ajitasüra parnok züa oa sademsadema adangtsü
- * Anü tesangwa kobalen nungi yaloktsür kanga junga metetsüla, aonsotsü süngdong talang akümbaji teti aonsotsü koba tedong tatsü lir iba sülenji tsünütsüla, ajida asü nungdang anü tesangwaji parnok ajak kesasa agitsü akoker.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Madhya Pradesh nung telok kati Khristan school ka raksatsü



Madhya Pradesh kübok Jabalpur yimti nung St. Aloysius School noksa nung angur.

July 20, 2026: July 14, 2026 nü Madhya Pradesh state kübok Jabalpur yimti tezülen Hindu nunger telok kati Khristan school ka raksatsü.

Khristan school nungji tamalen inyaker kati school nem tai tongloktsüba nung ajemdaker July 14 anepdang Hindu nunger lokti ka St. Aloysius Senior Secondary School tashi yimyim ayima ao aser school ji raksaja liasü.

Catholic diocese of Jabalpur nung putir, Thankachan Jose-i, "Parnoki school kidang kichiba aika raksatsü, ajisüaka police mapang shidak nung aruba ajanga loktiji nokdangteta liasü," ta metetdaksü.

Lokti jagisa school campus nung St. Aloysius kürakyanglua-a raksatsütsü merang.

July 15 nü osangbenertem den jembidang Jose-i, "Onoki tesüiba küm 25 tashi iba school ketdangsüa arur aser tang iba school nung tezüngdakpur kaketshir 2,500 lir. Tang

mezüng iba school anema tiyazü nung tai tonglokja inyaker," ta metetdaksü.

Tamalen iba school nung inyaksang jagi police aser education department dang, "Ni Khristan yimsü agizüksü memelungba agi ni mapa nungi anentsü," ta metetdakja liasü.

Jose-i, "Pa küm ka atema dang mapa nung shimoka liasü, ajisüaka pai maneni mapa inyaknü. Ketdangsertemi pa tebilemba mataloktsüba agi pai tejashi nung anti conversion özüng kübok school principal Father Somy Jacob anema ken o benoktsü, ta amokmerena liasü," ta metetdaksü.

Ajisüaka pai kuli magütsütetba agi pai Hindu yimsü alia amangertem ayongsemer school anema apuso asütsüa akok, ta Jose-isa metetdaksü.

Jabalpur nung taoba mapang Bishop, Gerald Almeida-i, iba ya state nung tawa Khristantem aser Arogo rejutem anema

inyakba den sendaktepa alitsüa akok, ta ashi.

July 16 nü osangbenertem den jembidang Almeida-i, "Onok school tem nung yimsü balala amangertem aika azünger mesüra mapa inyaker. Ajisüaka kar nem mapa magütsüra mesüra admission magütsüra onoki yimsü tangartem Khristan yimsü dangi meyipdaksütsü meranger ta tai tonglokja onok anema inyaker," ta metetdaksü.

Paisa, tiyazü nung tai tonglokja Khristantem anema inyaksü atema anti-conversion özüng ya tim masüba nung amshir, ta metetdaksü.

Tamalen Madhya Pradesh Freedom of Religion Act, 2021 kübok nun ka tena anema-a ken o benoktsü meranga liasü, ta pai ashi.

Nütsüng million 72 aliba Madhya Pradesh nung nütsüng shilem 0.27 dang Khristantem lir.

ANOGO ABEN TSÜNGREM DEN

Tenüng Asangba Kongki Ka
T.Ken 150: 1-6

Laishiba nung ken kaket Tenüngsang Kenji lir aser ken züluri tatem tenüng asangba aser tekülem indang asenoki metettsü Tsüngremi aginer ta tatsü agi jangjatsür. Khristan tamangji ken atenba aser tetushi agütsüba tamang lir. Asenok akaba ama tanga tammangba yimsü nung tenüng asangba aser ken atenba mali, kechiaser asenok mulungjang nung asenok Kibuba ken kar. Ken züluri iba ken nung tasüngdangba kar langzür.

Asenoki asangbaji shiba? "Kibuba sangang" (t.1) - arogo masü, sayutsüngir masü saka Kibuba. Asenok tebilemstsüji asenoki aiben Kibuba mangur. Asenoki Tsüngrem nungi sempet anguba mesüra manguba repranger. Asenoki ashir, "Kechiba Kibubai ya meinyak, mesüra kechiba ibai balaka inyak?" Asenoki Pa shidakba mangur. Asenoki sempetji atema tagütsür dangi odi. Asenoki temoatsüji atema moatsüsang dangi odi. Asenoki Kibuba sangdi. "Teti Kibuba nung pelaang; tanabena ni shiti, pelaang!" (Filipi 4:4).

Asenoki Pa kong asangtsü? "Pa temeshidak Tsüngrem sangang, anüng ali tsüngda nung Pa ain asoshi tenüng sangang" (t.1). Koda jangratemtsü teloktep ka. Kodang asenoki tenla kidang Tsüngrem tenüng sangdir, ibai kotak nung tenyartemi tenüng asangba ama lir. Tekülemdak mesüra kechi nungsa asenok lidir, asenoki Tsüngrem tenüng sangdi.

Kechiba asenoki Pa tenüng asangtsüla? "Pa tashi tulu mapa asoshi Pa sangang: Pa kanga uluba asoshi Pa sangang" (t.2). Pa kechi aser Pai kechi inyak iba asoshi asenoki Pa tenüng asanger. Asenoki Pa koda asangtsü? Jangzü ola agi, tzürang kongki aser tawaba kongki agi, asem atemba agi, tsüngsangba agi, lisü aser jemji kongki agi Pa sangang. Ken züluri ashir, "Kongki ajak bendenang. Nai akok tashi kongki bendenang aser asenoki Kibuba sangdi". Kari ibaji maginür, saka asenok dang Pa ola tulu agi külemtsü özüng agütsü.

Tanü yimya ajaki Kibuba tenüng asanger saka nüburi Pa amadoker. Ne sasa ken 150 nung tenüng asangba indang asüngdangang aser ken züluri langzüba shisadangang. Nai aika nung tenüng asangtsü kar. Pa tenüng asangba ajanga Tsüngrem mulungjang nung tepela bener arujang.

Khristantem tepsetba atema US-i Nigeria nem teyari magütsütsü



U.S. House of Representatives nung Rep. Greg Steube-i jembidang tangokba noksa nung angur.

July 20, 2026: Nigeria sorkari par linük nung Khristantem jenti tepsetba menokdangtet tashi United States-i Nigeria nem teyari kecha magütsütsü atema U.S. House of Representatives nung Bill ka agizükogo.

Iba bill ya Fiscal Year 2027 National Security, Department of State & Related Programs Appropriations Act kübok shilem ka lir.

Iba bill ya maneni Senate

nunga agizüksü aser Tir, Donald Trump-i sign asüba sülenbo özüng akümtsü.

Mezüngbo iba bill kübok US-i Nigeria nem teyari agütsüba shilem 50 soita ayutsü atema lemteta liasü, ajisüaka Rep. Greg Steube-i, 'Nigeria sorkari Khristantem kümzüksü aser aibelenertem nem temerenshi agütsütsü atema shidak inyakdar', ta U.S. secretary of state-i mesangdong tashi US-i

Nigeria nem teyari meshimeshia magütsütsüla, ta benokba sülen züngsem ajaki ibaji agizüka liasü.

Vote agütsütepba sülen Steube-i X ajanga, "Khristantem tepsetba nokdangtsü atema Nigeria sorkari meinyak tashi US-i Nigeria nem teyari agütsüba shilem 100 soita ayutsüla, ta ni benokba agizükogo. Khristantem apuba, reshikangshiba aser tepsetba nokdangtsü atema kecha meinyakba sorkartem nem America nungertemi teyari magütsütsüla," ta ashi.

Iba bill ya Senate-ia agizüka özüng kümra US-i Nigeria Tir Bola Tinubu-i aniba sorkar nem teyari kecha magütsütsü, aser ibaji ajanga Nigeria sorkari linük nung Khristantem kümzüksü atema inyaksüsa akümtsü.

Republican, Riley Moore-i, Nigeria nung Khristantemi küm jenti timtem aremzüka arur, aser parnok kümzüksü atema sorkari meinyaker, ta metetdaksü.

House of Representatives nung iba Bill agizükba sülen Moore-i, "Nigeria nung

Khristantem anema inyaker aser jenti tepseter, ajisüaka alima linüktemi Khristantem timtembaji mangu ama yutsür. Trump-i Nigeria nung kiralongrartem anema inyaksü atema telemtetba agia inyakdar, aser tang iba bill agizükba ajanga 'Alima tesem balala, talisa Nigeria nung reshikangshiba Khristantem atema United States-i maneni nokdaker' ta osang ka sangoktsütsü," ta metetdaksü.

Iba Bill ya agizüka özüng kümra America nungeri dollar sen million aika Nigeria nem teyari agütsüba ajak anenadoktsü.

America-i senotsü jenti indoka Nigeria nung health care, senskertem nem teyari agütsüba, security, governance programs aser terenlok mapa jenti inyaksür.

2024 küm kija nunga United States-i Nigeria nem dollar sen million 929 teyari agüja liasü aser 2025 küm nunga sen million 616 teyari agüja liasü.

Nigeria nung mapang talangka nungi security tsütsü tayongzüka jenti ajangshir. Iba

linük nung talisa Boko Haram aser Islamic State West Africa Province-i northeast nung timtem kanga agütsür, northwest nung özüng alema inyakba telok balalai timtem agütsür aser Middle Belt nung Fulani teloki Khristantem jenti tepseter.

Nigeria nung talisa Plateau state aser Benue state na nungbo mapang shia Tenla kitem aser Khristan yimtsüngtem amaker.

Nigeria nung Fulani telok, Boko Haram aser ISWAP (Islamic State West Africa Province) kiralongrartemi Khristantem jenti tepseter. Sorkari Khristantem meküzmükteter aser aibelenertem nem temerenshi magütsüteter. Alima nung Nigeria ya asalentong yanglur Arogo anema inyakba tiyongtsü tesem ka lir.

Talisa northern Nigerian states nung Sharia Islamic özüng kübok Khristantembo 'second-class' sensotem ama züngshir. Küm shia alima nung yimsü dak sendakba nung Khristantem teimba tepsetba linükji Nigeria lir.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Yujang

(v) tokjang (leave it)

* Nai abenba khuji yangi yujang.

Yutsü

(v) toktsü (left)

* Tsüraburi tanurtem asoshi tenüing tajung yutsü.

OLONG PAITEP # 7572

1		2		3		4	5			
				6						7
		8								
9				10		11				
			12						13	
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S_ _ _ i
9. Nisung rongnung telemasa
10. Anogoshi
12. Ajanga aor
13. Tsük rizüingdak
14. Tebang nungi adokba
16. Süngdong tatembangtiba
17. Meputep

- (5)

- (5)

- (5)

- (3)

- (3)

- (4)

- (4)

- (3)

- (3)

- (5)

- (5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

- (9)

- (5)

- (7)

- (5)

- (9)

- (7)

- (5)


- (5)

OLONG PAITEP # 7571 TELANGZÜBA**TIPIEN :**

1. Semtu, 3. Lepko, 5. Bilem, 8. Ulu,
10. Tsünpang, 11. Tesangwa,
13. Aoksa, 15. Putir, 16. Yipru.

LANGTSÜNGLEN :

1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

NAI-A YA METETTER

France nunger asayar Kylian Mbappé-i World Cup Golden Boot nguogo. France aser Real Madrid nungi striker Mbappé-i FIFA World Cup 2026 nung goal 10 tashi yokteta iba naroküm nguogo. World Cup (2022, 2026) ana nung Golden Boot anaben tashi angusangji pa lir.

Mbappé sülen Argentina nungi Messi (8 goals), Norway nungi Erling Haaland (7), England nungi Jude Bellingham (7), England nungi Harry Kane (6) aser France nungi Ousmane Dembélé (6) liasü.

Upper Assam nung tzümetsüing tensa kanga mejungi lir**Guwahati, July 20, 2026**

(Agencies): Upper Assam nung tzümetsüing tensa kanga mejungi kümogo aser district aika nung nisung meyrjang aika timtemer.

Upper Assam ayong aika nung tzü danger level tema yimdar ta ketdangsürtemi ashi.

Tzümetsüing agi kongshia aliba Sivasagar, Charaideo aser Jorhat district tem nung Army, National Disaster Response Force (NDRF) aser State Disaster Response Force (SDRF) ajanga rescue operations inyakdar.

"State sorkari tzümetsüing tensa atema sentong renema mapa tenzükogo aser rescue & relief operations nung tenük

yokdar" ta Chief Minister Himanta Biswa Sarma-i ashi.

Cabinet minister pezü tashi tzümetsüing agi kongshia aliba district tem nung mapa lezmüksüogo aser parnoki maparen ketdangsüa inyakdar ta pai ashi.

Chief Minister Sarma-isa tzümetsüing agi kongshia aliba district tem nungi MPs aser MLAs ajak pei pei tesem nung alitsü tetuyuba agütsüogo.

"Upper Assam nung tesem aika nung tzümetsüing tensa atema onoki whole-of-Govt approach tenzükogo. Tzünglu kanga aruba ajanga Jaji, Dikhow aser Dichang ayongtem nung tzü danger level madak ayimer

aser Jorhat, Sivasagar, Charaideo, Dibrugarh o anameta district tem metsüingbangogo" ta CM Sarma-i metetdaksü.

Upper Assam nung tzümetsüing ajanga railway services nunga kongshiogo aser railway tracks aika tzü agi metsüingbanga lir. Iba jagi Northeast Frontier (NF) Railway-i tongti lenmangtem nung train senzüba anendaksüogo.

Simaluguri-Namtiali aser Simaluguri-Selenghat sections nung train services ajak anenogo. Iba ya passenger safety aser operational risks noktangsü atema lir ta NF Railway-i metetdaksü.

ZPM nungi K Lalitluangkima-i Rajya Sabha MP inyaker**Aizawl, July 20, 2026**

(Agencies): Zoram nübortem dang pelaba

People's Movement (ZPM) lennir K. Lalitluangkima-i Hombarnü Rajya Sabha nung züngsem ka ama tezüngzüktep agiogo.

Iba sentong agiba sülen Lalitluangkima-i Tsüngrem, Mizoram sorkar, political

lennirtem aser state nung candidate Zothansangi Hmar-i vote 10 angu.

June 18, 2026 nü election nung Lalitluangkima-i votes 36 nungi 26 nguteta Rajya Sabha züngsem akümtsü takok ngua liasü.

Pa den tokteper opposition Mizo National Front (MNF)

Mizoram Assembly nung Bharatiya Janata Party (BJP) MLA 2 aser Congress MLA 1 lir aser parnok election nung candidate meyok. Maneni, BJP aser Congress MLA temi iba election nung vote enokba nung shilem magi.

GOVERNMENT OF NAGALAND**DIRECTORATE OF HEALTH & FAMILY WELFARE****NAGALAND : KOHIMA****No. DHFW-16/NVBDGP/DRB/2026/4938-41/****Dated, Kohimathe 17th July'2026****ADVERTISEMENT**

In pursuance of the Government of Nagaland, Department of Health & Family Welfare approval letter No. HFW(A)-12/170/2022/183 Dated 8th July'2026, Applications are hereby invited amongst the eligible indigenous inhabitants of Nagaland for filling up the under mentioned Surveillance Worker (SW) posts as shown below under the Department of Health & Family Welfare, Nagaland. This is in compliance of the P&AR Department, PIMS Cell Vide PC.NO.152 Dated 18-06-26 and concurrence of the Finance Department Vide RFC/ESTT.NO.35/131 dated 15-06-2026.

Sl. No.	Designation	Pay Matrix Level	No. of Posts	Eligibility Criteria
1.	Surveillance Worker (SW)	Level - 2	5	a. Class-VIII (Passed) b. Birth Certificate c. Open for all indigenous inhabitants of Nagaland. (Certificate to be enclosed) d. ST/BT Certificate e. 2 (two) Passport sized photos.

1. The minimum age of candidate shall not be less than 21 years and not more than 37 years of age as on or before 31/07/2026. The relaxation of upper age limit will be as per P&AR Department Office Memorandum Vide Order No.AR/GEN-6/7/2024/A/601 Dated Kohima the 15th October 2024.
2. The reservation of seats shall be as per the existing policy of the State Government as notified by P&AR Department Nagaland.
3. The advertised post is a Field/Technical post & is transferable.
4. Application Forms will be issued w.e.f.22/07/2026 during office hours at Room 202, Directorate of Health & Family Welfare at the cost of Rs.200/- (Two Hundred only)
5. Those applicants who have previously applied for the above mentioned post are hereby required to submit a fresh application/Re-apply.
6. Last date of submission of forms along with the documents will be on 31/07/2026 till 3:00 PM.
7. Result will be published in the local dailies. No separate calling letter will be issued.
8. List of rejected application will be pasted in the office Notice Board/Departmental portal.
9. Issue of Admit Card will be on 06/08/2026 & 07/08/2026.
10. Date of Walk-In-Interview will be on 12/08/2026 from 10:00 AM onwards, at IDSP Conference Hall, Directorate of Health & Family Welfare.
11. Candidates are required to bring their original relevant documents on the day of interview.

Sd/-**DR. MERENINLA SENLEM****Principal Director****Directorate of Health & Family Welfare Nagaland: Kohima.**

US-i aonung tekububa atonga Iran makogo

Dubai, Chiteni/July 20 (Agencies): United States-i aonung tekububa atonga anüing ajanga Iran makogo. Iran nung media sangdong balala ajanga ashiba agi, Sirik, Jask, Tabriz aser Chabahar nunger densema yimti aika nung bomb apokba ola angashioغو.

US military-i anogo ishika tsüingda parnok sepai tasembuba asüba osang metetdaksüba sülen Hombarnü yimtitem amakba osang sangdongogo. Linük ana ya Strait of Hormuz azüoktsü atema raraba mapang ceasefire atema nangzükteper aliba raksaogo.

US military-i ashiba agi, Iran military-i Strait of Hormuz nung rongtem amakba tashi ajemdaktsütsü atema parnoki military facility balala makdar.

US-isa, parnoki Iran indang

military command centre tem, air defence aser coastal surveillance tesemtem, maritime capabilities, missile aser drone yokba tesemtem aser communications network tem dak rangloker jenjang agia arudar, ta ashi.

Iran kübok tüküm nung aliba Bandar Mahshahr aser Bandar Imam Khomeini yimti nungi tenzüker Strait of Hormuz anasa Gulf nung Jask aser Sirik yimti nunger nung bomb pokloktsüba indang osang state broadcaster IRIB-i metetdaksüogo. Konarak aser Chabahar nunger nunga bomb apokba ola angashiba sülen Air defence system tem activate süja liasü, ta Fars news agency-i metetdaksü.

Maneni Bushehr province kübok Khvormuj yimti aser linük north len Tabriz yimti nunga bomb apokba ola angashioغو.

Al Jazeera osangbener Tohid Asadi-i Tehran nungi ashiba agi, US-i anogo tekububa atonga Iran south len tüküm nung aliba tesemtem makdar. US-i item tesemtem nung apu, railway line tem aser airport ka raksatsüogo.

Kasa mapang nung Islamic Revolutionary Guard Corps (IRGC)-i ashiba agi, parnokia telangzüba agüja Jordan aser Kuwait nung US military amendaker aliba tesemtem makogo. Kasa mapang nung Bahrain nunga siren ola agüja liasü.

IRGC-i ashiba agi, parnoki Jordan kübok Aqaba airport nung US indang tayimtsütem makogo aser Azraq kübok Muwaffaq Salti airbase nung hangar tem raksatsüogo. Parnokisa, Kuwait kübok Al Salem airbase nung US military facility tem amakba metetdaksüogo.

UK ato kilonser inyaktsü Andy Burnham shimogo

London, Chiteni/July 20 (Agencies): Hombarnü Andy Burnham ya küm ter nung Britain indang ato kilonser tenet buba kumogo, shibai osettsüset nung jenjang tali akumba aser services junga magütsüba ama nüburtemi temulung agütsüba tebilemtsü nung tali tejangjaba rangloka linük 'zülushitsü' nangzüük.

Par Labour Party nungi züngsem aser ato kilonser menden yutsüsang Keir Starmer-i 10 Downing Street kima nungib tatembang o jembidang, kü mapa tembanga inyakogo aser ni temulung süa aser menürema yutsür, ta ashi.

Pai King Charles nem pa mapa yutsüba osang agütsüba sülen chuba yagi Burnham ya jaoktsü aser ato kilonser inyaktsü asüngdangtsü.

Iba sülenji ang arishi küm 56 tain asoshi mapa tasak tenzüktsü, shiba Greater Manchester indang mayor ka ama inyakdang 'King of the North' nüngden ngua liasü.

Pai par cabinet sangdongba sülen rongsenketzüng mainba nungi 'cost-of-living' tebilemtsü

aser utility firms temi mapa shidak meinyakba densema tebilemtsü aika azüoktsüsa akumtsü.

Starmer, shiba par Labour ozüing yanglurtemi ita ka shi tejakdang mapa nungi atsüngdok, pai pa ato kilonser ka ama inyakba ya pa takum nung maongka tuluka liasü ta ashi aser Burnham-i takok ngua Britain ato kilonser mapa inyaktsü imlaba lemsatapa liasü.

"Ni pa teti yaritsü," ta Starmer-i ashi.

Ghonda ka shi lir Burnham ya Number 10 jakdang pa melenä nokdaker nüburtem den pa sentong lemsateptsü lir, ta pa indang office ajanga sangdong ka nung ashi.

Britain tebilemtsütem asoshi ochishia inyaktsü aser yimten tashi aitba ajanga dang terenlok alitsü ta pai ashitsü sentong lir.

Hokulbarnü Burnham-i pa Labour lenir akumtsü shimba ya linük nung küm 40 yimsüsüba tsütsü tongtipang temelenshi aruba mapang ka lir ta ashi.

Pai nüburtem libaliru jenjang ajungkettsü aser

melenshitsü yasatzüraba linük yaria nüburtem tali anisüngzüka lidaktsütsü asoshi political system melenshitsü nangzüka lir.

Burnham asoshi mezüingbuba tebilemtsüji par cabinet team shimtsüba ya lir, talisa pa indang fnance minister shimtsü. Yangji mepetmesü adokba ajanga tesüiba sorkar tem kümsük tembanga meinyakteti laoa liasü.

UK ato kilonser menden asoshi tetenzüklen yakbang sür toktepsang energy security and net zero minister Ed Miliband ya jenjang mejungi kumogo aser tangbo finance minister atema interior minister Shabana Mahmood ang shimtsü ama ajiteter.

Ajisüaka Burnham-i par team ano meshim lir ta Hokulbarnü shia liasü.

Taxation aser sen indokba, totzü aser gas aser mapa junga meinyakba utility company tem asoshi telemtetba agiba nung nübutemi tali rangloksü, kechiaser pai item company azüoktsü asoshi nüburtem nem tashi tali agütsüner.

Russia-i Odesa rongnendak menti abenba rong ka amak, nisung 10 tepset

Odesa, Chiteni/July 20 (Agencies): Ukraine south tsütsü Odesa rongnendak anasa menti bena aliba rong ka nung Russia-i missile khalokja nisung 10 asü, ta Ukraine ketdangsür temi Hombarnü ashi.

Guinea-Bissau nisan songa aliba Golden Leo rong ya India aser Syria nunger arua ketdangsüa liasü, kong Russia-i Deobarnü cruise missiles asem khaloktsü, ta Ukraine indang navy ajanga Telegram messaging app nung zülua liasü.

Deobarnü Odesa tükumlen rong ka nungi mokozü adoka aliba tenük kuli alir kati shiogo, koba Golden Leo lir ta Reuters-ia jangjatet.

Ammang tepiyong search and rescue operation agia liasü aser rong ketdangsür toku aser maritime pilots ka tepset, ta Ukraine indang seaports authority ajanga ashi. Rong nung ketdangsür 17 aliba nungi ti kumzükogo, ta ashi.

Golden Leo ya Mumbai nung aliba Ocean Grace Shipping Ltd meyong lir, ta LSEG data ajanga ashir. Moscow nungi iba tatalokba indang yimjak nung sangdong kecha agüja mali.

Russia-i 2022 küm tashi ajak amshia par kidanger Ukraine amakba sülen ita ishika Black Sea nung kanga sashia rara aru. Ajisüaka alima nung osettsüset jenjang tali akumba

ajemdaktsütsü mechi tezüingzüktep ka yanglua linük anaprongi iba tzüyim nung jang o tzü senzütsü mela.

Ajisüaka tang Moscow aser Kyiv nati Black Sea aser Sea of Azov aser revenue aruba tongtipang tesemtem nung maktepba tali kumogo.

Ukraine sepaitemi oil tankers densema Russian energy infrastructure nung aiben amak aser Russia-ia Ukraine indang deepwater ports aser khu abenba rong tem nung amakba tali kumogo.

Hombarnü Russia indang defence ministry ajanga Odesa nung yasüing totzü ayuba tesem ka nung amak ta ashi.

Russia-i tan ita Odesa region nung amakdang nisung 28 tepsetogo, ta iba region governor-i Hombarnü ashi.

Russia aser Ukraine ya jang o tzü bendang lima nung ayokba linüktem rongnung dena lir, saka iba tzü lenmang nung azüdokshi asendenshiba ajanga tebilemtsü akar.

Alima nung wheat export shilem 6 aser menti export shilem 11 shi Ukraine nungi lir, saka Russia-i missiles aser drone amshia amakba yong Black Sea ajanga jang o tzü belenba shilem asem shi ajema kumogo.

Ukraine-i amakba yong Sea of Azov nung Russia-i jang o tzü bendang lima leni yokba ajema kumogo.

Houthi teloki Saudi indang rongtem nem tenokdangba agütsü

Cairo, Chiteni/July 20 (Agencies): Yemen nung Iran-i teyari agütsüba Houthi teloki Hombarnü sangdong ka ajanga Saudi Arabia indang rongtem nem tenokdangba agütsüba metetdaksüogo. Iba ajanga US pur tang Iran den rara-a aliba mapang ano tesem tanga ka nung raratsüsa kümdaktsüba dang masü saka alima energy shishilemba nung tetsükdaktsü adokdaktsütsü.

US-i Iran indang power infrastructure tem maneni makra Temerem tzüyim nung Bab el-Mandeb lenmang shibangtsütsü atema Iran-i Houthi telok nongshia aruogo.

Houthis' armed forces-i sangdong ka ajanga ashiba agi, parnoki parnok tsükchir Saudi nem tenokdangba ka agütsüogo.

Panoki ashiba agi, Saudi-i tashiyim agi ozüing alema Yemen sabanga ayuba atema telangzüba agüja parnoki iba telemtetba agiogo.

Ken o dak sendakba nung Saudi Arabia-i kecha

telangzüba magütsü.

Bab el-Mandeb strait shibanga ayuba ajanga alima totzü supply shilem 7 agi tajemba akümtsü, kechiyong Saudi indang totzü timba iba tesem adena bener aotsü makoktsü. Gulf nung rara adoker aliba ajanga tang alima ajunga nung totzü supply shilem 10 agi ajemer aliba mapang tang iba lenmanga nokdangba ajanga tetsükdaktsü tulu adoktsü.

Iran aser U.S napronglai rara anendaktsütsü atema sensaksemtsü mulunga aliba temaitsü sayuba sülen Houthis puri iba tenokdangba agütsüba ya sangdongogo.

US aser Iran na taoba ita tenangzüktepba ka yanglu, saka maneni kati ka kanga sashia maktepa arudar.

Iran nunger ketdangsür kati Reuters dang Hombarnü ashiba agi, tenangzüktepba yanglur aliba kümzüktsü atema anogo 10 ceasefire benoktsü asoshi yimjung atema ken o sensaksemtsürtemi benokba osang Tehran-i angazükogo.

GOVERNMENT OF NAGALAND

DIRECTORATE OF TECHNICAL EDUCATION

NAGALAND : KOHIMA

NO. DTE/ ESTT-2/02/2023-24/

Dt. Kohima, the 20th July 2026.

NOTIFICATION

In continuation of this officeNotification NO.DTE/ESTT-2/02/2023-24,dated 14th July 2026, the CUET- UG Counselling scheduled on 23rd July 2026 has been postponed to 28th July 2026(Tuesday) at 10:30 AM in the Conference Hall of the Directorate of Technical Education, taking into consideration the interest of the student/candidates.

The provisionally selected candidates and the eligible candidates from Final Merit Listshave uploaded in the Department website:dte.nagaland.gov.in and the Office Notice Board. Sl.no 1- 500 of the State CUET-UG 2026 are hereby informed to attend the counselling as fixed.

Failing to attend the Counselling will be assumed as declined of the seat.

Sd/-
(Er.VIPULHOU LHOUNGU)
Director

Spain-i tang agi tanabenbuba FIFA World Cup kokogo



Chiteni/July 20, 2026

(Agencies): Küm tertrok tejakdang South Africa nung World Cup akokba sülen Spain-i 2026 World Cup final nung Argentina koka iba asayamung tanabenbuba benogo.

Extra time nung Ferran Torres-i goal ka idaktsüba sülen Spain-i FIFA World Cup tanabenbuba kokogo, aser kasa mapang nung Brazil-i 1962 küm iba asayamung anabenbuba atonga akokba sülen Argentina ya parnok indang title takok ngua defend asüba mezüngbuba team akümtsü nükjidong aliba metongteti asayamung tembangogo.

Argentina ya taküm iba asayamung nung ajaki tsüsuba attack süa asayaba team ka liasü, saka final nung goal ka danga magütsüteni tamakok nguogo.

Kasa mapang nung Spain-i teti asayaba ama asaya tetenzük nungi azüoker asaya aser tatem nung takok ngutetogo.

Atakzükja aliba asaya mapang minute 90 tashi goal idaktsütsü atema nongshia asayaba sülen Spain atema minute 106buba nung Torres-i goal ka idakja parnok takok angu. Asaya nung Pedro Porro-i cross asüba ball ka Nico Williams-i goal tepang nung kanga junga agütsüba sülen Torres-i aibelen mesüi idakja liasü.

Taküm iba asayamung nung Luis de la Fuente-i aniba team yagi kanga junga asaya-a asayamung tepeyong nung parnok goal ka dang achi aser asaya trok tashi goal ka danga mechi-i kanga takok ngua asayaogo.

Asaya junga masayateti Spain nem tanen makai amokmerena asaya aliba mapang Enzo Fernandez red card achiba ajanga Argentina team jenjang ano tamajungba kuma liasü.

Emiliano Martinez-i goal nung metsüoktsüba ball aika nokdanga Argentina team nem

timla agütsü. Spain atema Nico Williams-i goal ka idaktsü, saka VAR asadangba sülen iba goal magi, aser ano Ferran Torres-i goal ka idaktsü saka pa offside asüba ajanga goal magi aküm.

Final asaya ya Spain meyong liasü, parnoki tetenzük nungi asaya amokbanger asaya aser goal idaktsütsü atema maangka aika nguteta liasü. Kasa mapang nung Argentina team-i minute 90 tashi nung goal nung ball ka danga memetsüoktsüteni liasü.

Taküm World Cup nung Spain captain Rodri-i Golden Ball award angu, France captain Kylian Mbappé-i asaya ti nung goal 10 idakja Golden Boot award angu, Spain nunger centre-back Pau Cubarsi-i FIFA Young Player of the Tournament award angu aser Spain nungersa Unai Simon-i Golden Glove award ngua liasü. Iba asayamung atema Netherlands nem FIFA Fair Play Award agütsüogo.

Zimbabwe den asayamung nung Gambhir coach masütsü

Chiteni/July 20, 2026

(Agencies): Board of Control for Cricket in India (BCCI)-i, Zimbabwe den taruba T20 asayamung nung head coach Gautam Gambhir aser pa indang coaching staff temi shilem magitsü ta metetdaksüogo.

Gambhir coach asütsü shimba sülen tang mezüngbuba stand-in basis nung VVS Laxman national team coach asütsü. Rahul Dravid coach asüba mapang Laxman-i mapang shia national team coach mapa inyakogo. Gambhir ya küm ana shi khen danga anisüngzük makai India team den senzüdar aser pa tang mezüngbuba India team den asayamung ka atema maotsü.

Laxman stand-in basis nung inyakba mapang India team nung captain balala den inyakogo. Zimbabwe nung pa tang mezüngbuba Shreyas Iyer den külemi inyaktsü.

Iyer-i India T20I captain mapa Suryakumar Yadav ket nungi agizükogo. Yadav ya asayar shimertemi captain mapa nungi anentsü aser iba sülen India team nunga meshimi liasü. Iyer lenisüba nung India team mezüngbuba asayamung Ireland den asayaogo.

Iba asayamung nung India team-i asaya anaprongla mekoki liasü. Iba sülen ano parnok England den asaya saka asaya pezüprongla makok.

India team asaya trok tashi nung tamakok ngur aliba

mapang Laxman-i coach mapa agizüker asü nung pa asoshi mapang tasak asütsü. T20 World Cup anaben koker aliba team yagi World cup akokba sülen tang tashi nung asaya ka danga koker mali.

Laxman ya BCCI Centre of Excellence nung tekolak ama inyaka liasü asünung pa Dravid melena India head coach asütsü shimtsü imla liasü. Ajisüaka pai national team nung medeni COE nung maneni inyaktsü shim.

Laxman-i 2001 küm India indang head coach kümnüa liasü, saka BCCI-i Dravid, shim shiba iba mapang COE' indang tekolak liasü. Dravid lenisüba nung India team 2001 küm November ita nungi 2024 küm June ita tashi asayaogo.

WTA Tour nung asayatsü atema asayartem sex tendangtsü nüngdaker

Chiteni/July 20, 2026

(Agencies): Women's Tennis Association (WTA)-i, WTA Tour nung asayatsü atema tetsür asayartem ajak genetic sex tendangtsü telemetba agiogo.

Tawa yanglushiba women's eligibility policy, koba Mongolbarnü nungi benoka inyaktsü, iba inyakyim kübo asayartem ajaki, parnok dak SRY gene ali mali aji jangjatsü atema cheek swab ka, azü mesüra metzü agütsütsüla. SRY gene ya Y chromosome nung shilem ka lir aser iba ajanga male characteristics renlokdaaktsür.

Asayartem parnok taküm nung iba tetendangba ya khen dang agitsü, aser iba gene maliba jangja nung dang Tour nung tokteptsü atema temelaba agütsütsü.

Asayar ka dak iba gene aliba putetra la maneni medical tetendangba kar agiba sülenang asayatsü melatsü.

Policy tasenba kübok asayartemi, parnoki iba tetendangba agitsü memulungra parnok merenshitsü ta shia kuli kaket ka nung sign asütsü nüngdaksü.

WTA indang taoba policy koba 2024 küm yanglushia liasü, iba policy kübok transgender tetsür kati parnok indang testosterone levels ya küm ana atonga 2.5 nmol/L tekübok yutetra parnok Tour nung asayatsü atema temelaba

agüja liasü.

WTA Tour nung tang metatabo transgender tetsür ka danga masayar.

"WTA's women's eligibility policy ya tetsür professional tennis asaya nung ajak nem kasa maangka agütsütsü aser WTA asayamung nung asayaba asayartem ajak liromedema toktepdaktsütsü nükjidong nung yangluogo," ta tetsür tennis asaya achaayangba lokti tentet yagi ashi.

"Tawa inyakyim asadangshiba sülen, WTA board-i 2026 küm nungi tenzuka biological sex dak ajemdaker WTA women's eligibility policy yanglushiba agizükogo," ta kasa sangdong ajanga metetdaksü.

"WTA-i iba ya ken o tebenja ka ta meteta lir aser asayar ajak mebandangi benshitsü bendanga agütsür lir aser policy ya ajak akümetsüba bilemdanger benoker," ta WTA-isa shisem.

World Athletics-i, tetsür asaya nung asayaba asayartem world ranking tetoktepbu nung shilem agitsü atema khen gene tendangtsü asoshi inyakyim melenshiba sangdongba sülen tang WTA-ia iba onsang sangdongogo.

World Boxing-ia, 2025 küm May ita SRY tetendangba agitsü atema agizükogo, aser tetsür category nung asayatsüpurtem ajak sex tendangtsü atema inyakyim benokogo.

Rogers atema £117m agütsütsü Chelsea-i mulunga agizükogo

Chiteni/July 20, 2026

(Agencies): Chelsea-i Aston Villa nungi England nunger midfielder Morgan Rogers pound million 117 agi alizüktsü mulunga agizükogo.

Arishi küm 23 tain asayar yagi Stamford Bridge nung küm trok atema tenangzüktepbu yanglutsü, aser ano küm ka atsülangtsü asoshi lenmang sadema lapoka ayutsü.

Rogers England team nungi 2026 World Cup asayai or aliba meyipa aruba sülen Hombarnü temang tendangtsü.

Iba tenangzüktepbu yangluba ajanga England nunger asayar ka indang transfer record tasen ka yanglutsü akok. Manchester City-i Nottingham Forest nungi midfielder Elliot Anderson pound million 116 agi alizüker aliba tang Rogers alizükba agi ajatetsü.

Kasa mapang nung Rogers ya Chelsea puti otsü nung sen timtiba agi alizükba asayar akümtsü. 2023 küm Argentina nunger midfielder Enzo Fernandez pound million 107 agi

alizüka club-i record yanglur liasü.

Premier League season tasenba atema Chelsea manager Xabi Alonso-i pa indang squad yanglushiba mapang tang Rogers alizüktsü atema mulungtepogo.

Rogers ya 2024 küm February ita Middlesbrough nungi Villa nung oa aden.

Rogers-i Aston Villa nungi league asaya 85 ben asayaba mapang goal 21 idaktsüogo, aser pa taoba season Europa League akokba team nung tongtibang asayar ka liasü.

Pa England team nungi 22 ben asayaogo aser iba mapang goal ka idaktsür lir. Taküm World Cup nunga pa England team nungi tenetben asayaogo.

Youri Tielemans' pound million 35 agi Manchester United dang ayokba sülen Rogers ya club toktsüba Villa midfielder tanabuba asütsü, ajisüaka parnoki Switzerland nunger asayar Johan Manzambi pound million 50 aser Wolves' nungi Joao Gomes pound million 38 agi alizükogo.

BILEMDANGANG

"Tango sashiba ajaki temeim aginür."